



REPUBLIKA E KOSOVËS/REPUBLIKA KOSOVA

GJYKATA KOMERCIALE

Numri i lëndës: 2023:255411

Datë: 20.06.2024

Numri i dokumentit: 05841692

KPPP.nr. 1955/23

GJYKATA KOMERCIALE E KOSOVËS, Dhomat e Shkallës së Parë, Departamenti për Çështje Ekonomike, Gjyqtari Arnis Dumani, në çështjen përmbareme të kreditorit Kompania Regjionale për Mbeturina “Eko Regjioni” SH.A., Njësia Operative Rahovec me numër të regjistrimit të biznesit 70465066, kundër debitorit S.Z. B.I. me emër tregtar “Liridoni”, me numër unik identifikues 810387870 me seli në Rahovec, rr. Selajdin Mullabazi, duke vendosur lidhur me prapësimin e debitorit të ushtruar ndaj Urdhrit Përmbareme P.nr.718/23, i lejuar me datë 03.11.2023, nga Përmbaremi Privat Gjokë Radi, me seli në Gjakovë, jashtë seancës me datë 20.06.2024, mori këtë:

A K T V E N D I M

- I. APROVOHET pjesërisht si i bazuar prapësimi i debitorit S.Z. B.I. me emër tregtar “Liridoni”, ashtu që ANULOHET pjesërisht Urdhri Përmbareme P.nr.718/23, i lejuar me datë 03.11.2023, nga Përmbaremi Privat Gjokë Radi për borxhin në shumë prej 1,908,76€, dhe në këtë pjesë të përmbaremit procedura PËRFUNDOHET.
- II. REFUZOHET pjesërisht prapësimi i debitorit S.Z. B.I. me emër tregtar “Liridoni”, ashtu që pjesa tjetër e Urdhrit Përmbareme P.nr.718/23, i lejuar me datë 03.11.2023, nga Përmbaremi Privat Gjokë Radi, sa i përket borxhit në shumë prej 424,25€, MBETET NË FUQI.

A r s y e t i m

Përmbaremi Privat, duke vepruar sipas propozimit të kreditorit Kompania Regjionale për Mbeturina “Eko Regjioni” SH.A., me datë 03.11.2023 ka lëshuar urdhrin përmbareme P.nr.718/23, me të cilin ka lejuar përmbaremin në bazë të dokumentit Ekstraktit nga librat e kontabilitetit korrik 2006 – shtator 2023 ashtu që është detyruar debitori që në afat prej shtatë

(7) ditësh nga dita e pranimit të urdhrin, në emër të borxhit të papaguar për shërbimet e furnizimit me ujë, t'ia paguaj kreditorit detyrimin në vlerë prej 2,334.01€, si dhe shpenzimet e procedurës përmbartimore. Nëse debitori nuk posedon mjete monetare në llogarinë e tij bankare përmbartimi do të zbatohet përmes regjistrimit, sekuestrimit të sendeve të luajtshme dhe të paluajtshme të debitorit dhe me shitjen e tyre në ankand.

Debitori, brenda afatit ligjor e ka kundërshtuar në tërësi urdhrin për lejimin e përmbartimit me arsyetim se detyrimi është parashkruar për shkak të arritjes së afatit të parashkrimit. Më tej ka theksuar se kreditori ka kërkuar ekzekutimin vetëm në bazë të kartelës së konsumatorit mirëpo kjo nuk mjafton për vërtetimin e gjendjes faktike në mënyrë të plotë dhe të drejtë. Andaj, me pretendimin se dokumenti mbi bazën e së cilit është iniciuar procedura përmbartimore nuk është dokument i besueshëm, i ka propozuar gjykatës që të aprovoj në tërësi si të bazuar prapësimin e debitorit dhe të anuloj urdhrin përmbartimor.

Kreditori, në përgjigje në prapësim ka kundërshtuar në tërësi pretendimet e debitorit të paraqitura në prapësim duke shtuar se dokumenti në bazë të së cilit është iniciuar procedura përmbartimore është titull ekzekutiv dhe dokument i besueshëm. Duke kundërshtuar në tërësi pretendimet e debitorit, gjykatës i ka propozuar që prapësimin e debitorit ta refuzoj në tërësi si të pabazuar.

Gjykata pas shqyrtimit të pretendimeve të debitorit të paraqitura në prapësim, përgjigjes së kreditorit në prapësim, si dhe pas shqyrtimit dhe vlerësimit të provave që gjenden në shkresat e lëndës, duke iu referuar dispozitave të nenit 69 dhe 71 të Ligji Nr. 04/L-139 për Procedurën Përmbartimore, (në tekstin e mëtejshëm: “LPP”), gjeti se prapësimi i debitorit është pjesërisht i bazuar dhe vendosi si në dispozitiv të këtij aktvendimi, për arsyet si në vijim:

Sipas nenit 29, paragrafi 1 i LPP-së, “Përmbartimi me qëllim të realizimit të kërkesës në të holla caktohet edhe në bazë të dokumentit të besueshëm”, ndërsa pika 1.2 e të njëjtit nen përcakton ekstraktet e verifikuara nga librat afariste për pagesat e shërbimeve komunale të furnizimit me ujë, energji elektrike dhe bartjen e mbeturinave si dokumente të besueshme sipas së cilave mund të caktohet përmbartimi për realizimin e kërkesës në të holla. Tutje, me paragrafin 3 të të njëjtit nen parashihet se: “Dokumenti i besueshëm është i përshtatshëm për përmbartim po qe se në të është treguar kreditori dhe debitori, si dhe objekti, lloji, shuma dhe koha e përmbushjes së detyrimit monetar”. Në anë tjetër, sipas nenit 37 të LPP-së: “Kur propozimi për përmbartim paraqitet në bazë të dokumentit të besueshëm, mjafton që propozimit t'i bashkëngjitet dokumenti i tillë origjinal apo kopja e tij e vërtetuar sipas ligjit”.

Në rastin konkret gjykata vlerëson se urdhri i lejuar nga ana e përmbaruesit privat bazohet në dokumentin e besueshëm përkatësisht ekstraktit nga librat e kontabilitetit korrik 2006 – shtator 2023, i cili përmban të gjitha tiparet e dokumentit të besueshëm sipas nenit 29.3 të LPP-së, meqenëse në ekstrakt janë treguar palët, përkatësisht kreditori dhe debitorit, janë përshkruar shërbimet të cilat kanë qenë objekt i faturës, si dhe është përcaktuar shuma e cila është detyrim për përmbushje nga ana e debitorit.

Ndërsa, pas vlerësimi të pretendimeve të debitorit lidhur me afatin e parashkrimit, gjykata ka shqyrtuar ekstraktin mbi bazën e së cilit është lejuar urdhri përmbarimor në mbështetje të dispozitave nga 355 paragrafi 1 dhe 2 të Ligjit mbi marrëdhëniet e detyrimeve (LMD), ka ardhur në përfundim se kërkesa e kreditorit pjesërisht është parashkruar.

Sipas nenit 355.1 të LMD-së, *“1. Kërkesat reciproke nga kontratat komerciale si dhe kërkesat e shpërblimit të shpenzimeve të bëra lidhur me këto kontrata, parashkruhen për tri (3) vite. Ndërsa me paragrafin 2 të po të njëjtit nen është përcaktuar se: “Parashkrimi rrjedh veç e veç për çdo dërgim të mallit, pune ose shërbimi të kryer”*. Në rastin konkret duke llogaritur afatin e arritjes për pagesë të secilës kërkesë veç e veç, rezulton se kërkesat e kreditorit për faturat e përfshira në ekstrakt nga data 01.01.2019 deri me datën 31.10.2020 në shumën prej 1,908,76€, kanë arritur afatin e parashkrimit, ngase propozimi për përmbarim nga ana e kreditorit në raport me këto fatura është paraqitur me datë 31.10.2023, ndërsa për secilën nga kërkesat e kreditorit sipas faturave të cekura më lart kanë kaluar më tepër se 3 (tri) vite nga koha e arritjes për pagesë.

Ndërsa sa i përket borxhit sipas faturave për periudhën kohore 30.11.2020 e deri me datë 30.09.2023, në shumën prej 424,25€, gjykata gjeti se të nuk janë përfshi në parashkrim për arsye se për këtë pjesë të borxhit, propozimi për përmbarim është paraqitur brenda periudhës tre (3) vjeçare nga dita kur secila kërkesë është bërë e arritshme.

Nisur nga fakti se në rastin konkret gjykata ka aprovuar pjesërisht prapësimin e debitorit duke u bazuar në nenin 12.2 të Ligjit Nr.05/L-118 për Ndryshimin dhe Plotësimin e Ligjit Nr.04/L-139 për Procedurën Përmbarimore, me të cilin përcaktohet se: *“Në rast se e aprovon prapësimin, gjykata varësisht nga rrethanat e rastit e përfundon përmbarimin në tërësi ose pjesërisht dhe i anulon veprimet e kryera”*, gjykata vendosi si në pikën I të dispozitivit, duke përfunduar procedurën përmbarimor për pjesën e detyrimit në lartësi prej 1,908,76€.

Nga sa më sipër, në mbështetje të nenit 71 dhe 73 të LPP-së, nenit 12.2 të Ligjit Nr. 05/L-118 për Ndryshimin dhe Plotësimin e Ligjit Nr. 04/L-139 për Procedurën Përmbarimore, si dhe nenit

13, pika 1.2 të Ligjit nr. 08/L-015 për Gjykatën Komerciale, u vendos si në dispozitiv të këtij aktvendimi.

**GJYKATA KOMERCIALE E KOSOVËS**

Dhomat e Shkallës së Parë - Departamenti për Çështje Ekonomike

KPPP.nr. 1955/23, datë 20.06.2024

Gjyqtari  
Arnis Dumani

**KËSHILLA JURIDIKE:** Kundër këtij aktvendimi palët kanë të drejtë ankese në afat prej shtatë (7) ditëve, nga dita e pranimi të aktvendimit, në Dhomat e Shkallës së Dytë, në Gjykatën Komerciale të Kosovës, përmes Dhomave të Shkallës së Parë të kësaj Gjykate.